



## KEMENTERIAN PERTANIAN DAN INDUSTRI

### MAKANAN

*Ministry of Agriculture and Food Industries*

Wisma Tani

No 28, Persiaran Perdana, Presint 4

Pusat Pentadbiran Kerajaan Persekutuan No. Telefon : 03-8000 8000

62624 PUTRAJAYA, No. Faks : 03-8888 6020

MALAYSIA Laman Web : [www.mafi.gov.my](http://www.mafi.gov.my)

## SIARAN MEDIA

### PROGRAM SENTUHAN KASIH TANI BERSAMA YB MENTERI PERTANIAN DAN INDUSTRI MAKANAN

**TELUPID, 16 Oktober 2021** – Kementerian Pertanian dan Industri Makanan (MAFI) melalui Jabatan Pertanian Malaysia (DOA) telah menyalurkan beberapa insentif hari ini seperti Program Kebuniti, Program Pertanian Organik dan MAFI Prihatin melalui penganjuran Program Sentuhan Kasih Tani bersama YB Datuk Seri Dr. Ronald Kiandee, Menteri Pertanian dan Industri Makanan yang bertempat di Dewan Kg. Bauto, Telupid, Sabah.

Pandemik COVID-19 dan langkah mitigasi yang diambil bagi melandaikan keluk pandemik ini telah menguji daya tahan sistem makanan negara sekaligus telah memberi kesedaran terhadap betapa pentingnya pengeluaran bahan makanan tempatan dan rantaian bekalan makanan yang terjamin serta stabil. Dalam hal ini, MAFI sentiasa berusaha meningkatkan pengeluaran makanan secara domestik serta memberi nilai tambah dalam kehidupan rakyat melalui peluang limpahan ekonomi hasil daripada aktiviti pertanian.

Turut serta, YB Tuan Samad Jamri, Pembantu Menteri Pembangunan Luar Bandar Sabah yang juga Adun Labuk, YBrs. Encik Johari bin Abdullah, Pengarah Bahagian Pengembangan Pertanian Jabatan Pertanian Malaysia, YBrs. Encik Bacho Paska, Wakil Setiausaha Tetap Kementerian Pertanian dan Perikanan Sabah, YBrs. Puan Hajah Anita Binti Haji Misuari, Pengarah Lembaga Pertubuhan Peladang Sabah dan YBrs. Encik Nasrul Omar, Wakil Pegawai Daerah Telupid.

Dr. Ronald berkata, secara keseluruhan Kerajaan telah memperuntukkan sebanyak RM63.32 juta setakat ini kepada MAFI bagi menjayakan Program Kebuniti di seluruh Malaysia. Ia memberi manfaat dari aspek ekonomi, sosial dan persekitaran setempat selain menjana peluang pekerjaan dan menyokong kepada keperluan makanan penduduk bandar dan luar bandar.

Tambah Dr. Ronald, sejak 2014 sehingga 2020, sebanyak RM28.82 juta telah diperuntukkan untuk Program Kebuniti termasuk 10 juta ringgit di bawah Pelan Jana Semula Ekonomi Negara (PENJANA) pada tahun 2020 yang telah memberi manfaat kepada 165,207 orang di seluruh negara.

“Susulan daripada sambutan yang menggalakkan daripada masyarakat telah mendorong Kerajaan untuk memberi peruntukkan tambahan sebanyak 30 juta ringgit pada tahun 2021 selain peruntukkan tahunan sebanyak RM4.5 juta yang telah memberi manfaat kepada 39,608 orang melibatkan 25,775 lokasi seluruh Malaysia. Ini

menjadikan jumlah keseluruhan diperuntukkan untuk Program Kebuniti setakat ini adalah sebanyak RM63.32 juta,” jelas Dr Ronald.

Seramai 300 peserta daripada pelbagai kampung di Telupid, Sugut dan Labuk akan menyertai Program Kebuniti hari ini. Peserta Program Kebuniti ini menjalankan kaedah penanaman secara konvensional dengan insentif pertanian seperti pasu panjang (*planter box*), peralatan kecil, baja dan benih tanaman.

Manakala Program Pertanian Organik turut diperkenalkan pada tahun ini bagi meningkatkan hasil pertanian ke arah makanan yang selamat dimakan dan mesra alam. Peruntukan berjumlah RM50 juta daripada MAFI untuk Program Pertanian Organik telah disalurkan kepada pelbagai Jabatan dan Agensi di bawah MAFI seperti DOA, Lembaga Pertubuhan Peladang (LPP), Jabatan Perkhidmatan Veterinar (DVS), Jabatan Perikanan (DOF) dan Institut Penyelidikan dan Kemajuan Pertanian Malaysia (MARDI).

DOA telah menerima peruntukan berjumlah RM10 juta dan daripada jumlah tersebut sebanyak RM500,000 telah disalurkan kepada Jabatan Pertanian Negeri Sabah pada 10 Mei 2021. Seramai 27 komuniti di daerah Beluran, Sabah melibatkan seramai 83 orang peserta dengan keluasan seluas 33 hektar telah menerima manfaat daripada Program Pertanian Organik.

Terdahulu, Dr. Ronald juga berkesempatan menyampaikan sumbangan MAFI Prihatin kepada penduduk sekitar Kampung Bauto, Telupid yang terjejas akibat pandemik COVID-19. Inisiatif MAFI Prihatin ini dijayakan melalui kerjasama Persatuan Gabungan Pekebun Buah-Buahan Malaysia (FMFFA) dan Persatuan Buah-buahan Negeri Sabah melalui sumbangan 250 kotak bantuan makanan berupa bahan makanan asas seperti beras, gula, tepung dan sebagainya untuk diserahkan kepada kumpulan sasar yang dikenalpasti.

MAFI merakamkan penghargaan di atas kerjasama baik oleh Kementerian Pertanian dan Perikanan Sabah, DOA, Jabatan Pertanian Sabah dan Lembaga Pertubuhan Peladang Sabah serta semua pihak kerana berjaya melaksanakan program ini.

###

**Disediakan oleh;**

**Jabatan Pertanian Malaysia**

**Kementerian Pertanian dan Industri Makanan (MAFI)**

No. Tel. : 03-8870 3045 / 3042

E-mel : [pro@doa.gov.my](mailto:pro@doa.gov.my)